



QUÆSTIO MEDICA

CARDINALITIIS DISPUTATIONIBUS

MANE DISCUTIENDA

IN SCHOLIS MEDICORUM.

Die Jovis 15. Februarij.

M. JOANNE BAPTISTA FERRAND,
DOCTORE MEDICO, PRÆSIDE.

*An ad vitam benè salubriùrque ducendam aqua vino
præferenda?*

I

HOMO rerum rex, non quidem origine, sed multâ mortalitas, non citiùs incipit fieri vivere & nasci, quàm mori, propter eum, quem in dies patitur, perennis suæ substantiæ effluxum; edax quippe calor humidum connatum, cui insedit, continuò depascitur, quòd assumpta quævis vel laudabilissima reparare minùs possunt; ad protrahendam ergò vitam pabuli multa est necessitas, non ad mortem declinandam; duplex illud meritò agnoscitur, solidum unum, alterum liquidum, ad quæ duo prosequenda, toridem natura velût incitamenta dedit famem & sitim; hæc cibum adperit, quò siccioris substantiæ effluviū restituatur, illa potum, quo humidioris jactura reparetur; ad utrumque gustus invitat, cui summa innata fuit voluptas, quâ toties edendi necessitas, totiesque iterandus labor, compensari aliqua ratione posset; cibus por-

12.
rò & potus quò simplicior, eò convenientior: pane igitur & aquâ foelix duceretur vita, nisi ingluvies ad compositiora viam aperuisset; ab eâ certè petenda tot varia morborum genera, quæ in genus humanum tam atrocitè sæviunt; primi namque homines diutissimè vivebant, non tam quia puriori cœlo, quàm quia simpliciore utebantur edulio; non tanta est cibi, quàm potus necessitas; hinc fames siti longè tolerabilior; sitis quidem urit, fames premit tantum; undè facilius est repleri potu quàm cibo, cum ille citissimè rapiatur ad partes per vias patentissimas, quod cibo negatum, nisi post aliquam in ventriculo moram.

II.

ALIMENTI necessitas omnia æquè urget animalia, quibus tamen vegetior est calor, illis major ciborum copia admovenda; ut pulchra & commoda ster sanitas, calore metiendus est cibus, qui ad ingenij mores & acumen non parum confert, cum intima fieri debeat corporis substantia; at cibus asque aqua noxius omnino, tantum abest ut juvet; torreretur quippe potius quàm coqueretur, nisi liquoris benefici virtute temperaretur; aridum humidi loco accederet, si nudus iret ad partes, fatumque sic acceleraretur; ita profectò ad vitam animantium corpora aquâ perfundi amant; sed si assumptum illa juvat cibus, pariter & assumendo conducit; panis ciborum optimus, & qui solus sufficeret, aquæ beneficio fit edulis; molâ teruntur grana, at quæ prodit inde farina, nisi aquâ prius dilueretur, frustrâ manu subigeretur, fermento excitaretur, & in clibano coqueretur; hæc, si optimam quaris, sincera sit & defœcata, omnis qualitatis expers, dulcis & jucunda gustui, consistentiâ tenuis, quæ citò calefcit & refrigeretur, ventri & hypochondriis minimè gravis, qualis pluvialis, tonante Deo, præcipitata, vel fontana ab oriente scaturiens per ductus purissimos, vel fluvialis cursu admodum rapido levior & exercitata.

III.

LIQUOR hic argenteus Mundo cœvus, omnibus animalibus notus, longè vino salubrior est, & naturæ nostræ optimè conveniens; cibi vehiculum est familiarissimum, sitim, vel quam Bacchus inducit, ex facili sedat, caloris corpus administrantis excessum temperat, humidi primigenij natu-

ralem, vel ejusdem à mero factam dissipationem, eam remorando reparat; viscerum ariditatem prohibet & sanat; coctioni cuilibet, quæ elixationi similis est, inservit, quam vinum suo fervore conturbat; nativum calorem coctionis auctorem promovet; cibos in ventriculo diluit & permiscet, confectoque cibo utilem succum secernit ab inutili, non sècùs ac aqua calida, oleis tritis, oleum ab amurcâ separat; succus autem utilis aquâ comite, quoquo versum per meatuum flexus deducitur, & in angustissimas quasque partium venu-las penitiùs inferitur, per oscula & cæca foramina, roris modò percolatur, in omnem partis substantiam deciduus allabitur, per omne spatium diffusus combibitur, glutinisque modò firmiter adhærescit, donèc tandem assimilatus uniat. Quid plura, partes supervacaneis recrementisquæ expeditiùs, ejus miscela, liberantur, quæ omnia aut vix, aux male fierent, si aquæ beneficentissimæ vices vinum subiret.

IV.

VINUM cruor est terræ, naturâ suâ calidus & siccus; qui proindè vitæ, quæ in caloris & humoris commensuratione consistit, contrarius est omnino & inimicus: ex maturis ille uvis expressus, ab ebullitionis fervore superbior, in eos qui pro Deo gulam & ventrem habent, velût amor in effœminatos & desides, tyrannidem exercet; mendacibus tamen deliciis potantes deludit, quas citissimè excipit majus incommodum; nonnè idcirco voluptuarium venenum suo merito censerî debet, quod vel parvâ copiâ epotum, ignem igni addendo, totum corpus incendit? quò plus bibitur, eò plus nocet, & quam, vel indito nivali frigore, extinguere deberet sitim, quæ frigidi & humidi appetitus est, eam perpetuis caloribus intendit, siccitate humidum vitale lædit, crassitie substantiæ & fœcibus obstructions parit, omnium ferè morborum causas, bilem vel facit, vel accendit, dùm se ipsum in bilem convertit, caput animæ domicilium fumis lancinantibus impetit, Cephalalgiam, Vertiginem, Veternum, Apoplexiam, Paralytim, Febrem accersit, tandèmq; stupiditatem & insaniam advocat miserabili successione; horum præcursores malorum sunt, manuum, oculorum, & linguæ mordacioris petulantia effrænîs, turpis vomitus, nervorum tremor, sensuum retusio vel abolitio, virium collapsus;

quæ omnia nullo alio remedio⁴ prævertere vel emunctissimæ
naris Medicus poterit, quàm, vino posthabito, salubri aquæ
laudabilis utu.

V.

AQUA igitur sola, Palladis nectar, & lac terræ, nutrit
humani generis, in perpetuis debet esse delitiis ei, qui
sanitati consultum voluerit; unicus prudentiæ potus illa sit,
quæ omni & ab omnibus sæculis convenit animali; quæ omni
hominis ætati saluberrima, quocunque altero potu liberalius
& copiosius potest ingeri, omnique alio, faciliior, amabiliior
& innocentior debet reputari. Hæc sola balnea componit
ad sanitatem, fucus est oris innocuus, somnum vel intrus
assumpta conciliat, vel extrus suo murmure adducit, pharma-
cum est omnium ferè affectuum, vel ipsius, si possibilis esset,
immortalitatis; absque illâ hæc aquâ, vitæ mors est vita, quæ
animi deliquiis confert, sensus penè extinctos reficit, menti
perditam vino sanitatem reddit. Ut valeas itaque mente,
corporeque vigeas, quæ vita beata est, vivas abstemius;
nam ut puritas omnis vino madida corrumpitur, sic mens
ab eo libera, fœdis cupiditatibus non inquinatur; aqua sola
sit omnium horarum potus, omnium epularum anima, quâ
nihil ad vitam foeliciter ducendam conducibilius, quâ nihil ad
corporis & animi bonam valetudinem diu continendam ac-
ceptius, aptius & optabilius bona rerum mater natura mor-
talibus impertiit.

*Ergo ad vitam benè salubriterque ducendam aqua vino
preferenda.*

Proponebat Lutetiæ CLAUDIUS MARILLIER,
Neocastrensis, A. R. S. H. MDCLXXIV.

P A R I S I I S,
Ex Typographiâ FRANCISCI MUGUET, Regis ac Illust.
Archiepiscopi Typographi.